

A firma contract di 180 miyon florin pa renoba y amplia hospital



ORANJESTAD - Cinco partidonan involvi den e proyecto di renobacion y ampliacion di Horacio Oduber Hospital a firma e contract ayera na Renaissance Convention Center.

E partidonan tabata gobierno; cu a bende e edificio pa asina por financia e proyecto, Soga e fundacion cu a haya e edificio y a busca e financiamiento; AIB e banco cu ta forma parti di Soga pero tambe ta involvi den e parti di busca financiamiento; OHL Arellano, e compania Mericano cu a gana e destaho publico y e director financiero di e hospital. E contracto ta pa cu e compania por cuminsa e trabou di construccion otro luna. E

preparacion a cuminsa bou di e gabinete Eman 1 caba y e tempo ey Soga a bisa cu por cuminsa construi aña pasa caba. Pero e problema a cuminsa ora e destaho a tarda y parlamento tambe a exigi cu mester a bin un destaho publico. E proyecto mester e aprobacion di parlamento pasobra gobierno a regala e edificio pa Soga y tambe lo bay paga un suma di huur pa asina e edificio lo wordo mantene ora e ta renoba y amplia. E contracto pa construccion tin un balor di 180 miyon florin pero e gastonan total pa cu parlamento a duna su aprobacion, ta alrededor di un 212 miyon florin. Despues e destaho publico

cual Arellano a gana, a bin un periodo extenso di negocia pasobra e oferta di e compania Mericano tabata mucho halto. Friendsel Giel, director di AIB, a splica Bon Dia Aruba dos luna pasa cu mester bin un proceso di 'value engineering' local ta nifica cu mester wak unda por corta gastonan sin e ta afecta e calidad di e renobacion y ampliacion di hospital. Na maart e proceso mester a caba pa nan por cuminsa cera e contracto na april, Giel a indica. Minister di Salud Publico, Alex Schwengle, ya a bisa na maart cu e prome piedra lo wordo poni na juni, pero otro luna ta cuminsa caba cu e preparacion di construccion. Schwengle a bisa ayera cu e

negociacionnan tabata basta intenso. Na momento cu a cuminsa cu e plannan e tabata traha den hospital como especialista di pulmon y tabata den un otro posicion. "Mi por bisa boso cu tin un necesidad grandi pa un hospital nobo. No solamente un edificio nobo, pero tambe e forma cu nos ta traha. Despues di e negociacionnan duro, nos a yega na un bon final y awe nos ta firma e contract asina importante. Un acuerdo cu ta marca un era nobo pa cuida medico cu oportunidadnan nobo". Pa yega na e contract final, segun e corant Amigoe ayera, a spaar 58 miyon riba e oferta original di Arellano y segun Giel e ta riba decoracion, asfalt pa un parkeer-

plaats pa personal y riba sub contratistanan. Director financiero di hospital Theo de Kool a papia ayera riba e plannan cu tin riba mesa pa renoba y amplia hospital, loke ta algo masha necesario. De Kool a splica den corto con e hospital ta bay funciona den futuro. E tendencia cu hende no ta keda largo mas den hospital ta algo mundial. Mas lihe e pashent bay cas, miho ta pe mes. Tratamento cu ta tumu solamente un dia ta un bon desaroyo. "Ta p'esey cu e hospital nobo no mester di mas cama, pero si mas y miho facilidadnan di diagnostica, facilidadnan pa pashentnan ambulante y miho policlinicanan". □